



Selasa, 12 Oktober 2021

Ogen: Kuan-kuanen 6:6-11



ERLAJAR ARAH PERKIS



Perkis e me salah sada rubia-rubia si mbue kal banci si pelajari arah ia. Ketutusan, kiniersadan arih, gegeh ras kinijingkatan. Siutamana kal i bas kiniersadan arih bage pe perjuangenna mpepulung pangan tupung wari perlego. Perkis la lit perpulungen ntah pe persadanna, la lit organisasi sosial bage pe labo lit penguasana, tapi amin bage gia radu ras ia si legin ukur si ndahiken dahin mpepulung kasa kai si banci isusunna guna masa paceklik, masa-masa la lit man pangan. I bas daerah Timur Tengah rusur jadi perputaran musim, i ja piga-piga tahun masa rani riba-iba emaka reh ka masa kelehen. I bas masa riba-iba e arus lit kepentaren nusunsa, maka seh ka paksa kelehen, la tulpak. Em si lakoken Jusuf i Mesir. Iaturkenna si erdahin guna mpepulung 5 persen arah peranin guna kas negara. Mejingkat ia, janah ratur kerina pendahin suruh-suruhan e i bas ndahiken si isuruh tuanna. Emaka seh kenca masa kelehen e, bangsa Mesir lebe, la lit kekurangan. Bangsa-bangsa si deban si terkena musim kelehen e pe dungna erdemuyung reh guna ndatken penampat bas bangsa e nari. Melala perkara si banci meneken keriahen ukurta ras erbahansa kita jadi mekijat. Kebenen tujuan nggeluh, kurang iergai kalak, ulih pendahin la bagi ukur. Enda kerina tantangan si arus si lawan. Kalak perkisat e me kalak si la nggit maju. Kalak si murah menyerah ras talu ibahan tantangan pasti talu ka bas kegeluhen. Paksa kesusahen reh me, biak kalak pejuang si tetap mejingkat ras la arapkenna kalak natang-natang geluhna, e me kalak si permenang. Anak-anak Tuhan tujuan geluhna e me mpermuliaken Tuhan, bas kerina dampar jadi usihen janah mbue ia erlajar mahanca ia jadi kalak pentar. La mela erlajar arah kai pe, termasuk erlajar arah perkis jadi kalak si mejingkat ras maba ulih.